

ARUBA MERECE MIHOR



2013 - 2017

PUNTONAN DI ACCION

ECONOMIA FAMILIAR • ECONOMIA DI NOS PAIS
CALIDAD DI BIDA • SEGURIDAD
SALUD • FINANSAS • ENSEÑANSA



NOS COMPROMISO PA UN ECONOMIA FAMILIAR STABIL Y BAHU COSTO DI BIDA

- Amplia e canasta basico cu mas producto cu Gobierno tin control di prijs y introduci un control mas riguroso di prijsnan den supermercadonan, y baha prijs di awa y coriente cu 50%, importando hidro energia di paisnan den regio, a traves di un kabel submarino.

NOS COMPROMISO PA DESARROYO ECONOMICO Y CREA MAS CUPO DI TRABAHO

- Pone tur esfuerzo den re-apertura di e refineria, y introduci un BANCO DI DESARROYO pa stimula un generacion nobo di empresari-
onan local, riba nivel chikito y mediano pa asina crea cuponan di trabou y pa stimula fabricacion di productonan traha na Aruba "MADE IN ARUBA".

NOS COMPROMISO PA BRINDA UN MIHOR CALIDAD DI BIDA

- Re-evalua e sistema di duna 'onderstand' cu control mas estricto y yuda esnan mas vulnerable den nos comunidad cu asistencia efectivo y duradero pa no cai den mas problema.
- Introduci un protocolo estricto den caso di abuso fisico y sexual di mucha, adulto y nos grandinan pa brinda mihor proteccion na e victima y sosten na e victima y su famia.

- Crea mas facilidad pa cuidu y desroyo di esnan cu incapacidad fisico y/o mental, y centronan di rehabilitacion cu cuidu profesional y elimina discriminacion contra esnan cu un incapacidad na pia di trabou y crea mas oportunidad pa trabou pa esnan capacita pa traha.

- Percura pa un cuidu digno pa nos adultonan mayor den casnan di cuidu, y pa esnan cu ta biba na cas; reevalua e maneho di subsidio, y introduci posibilidad di subsidio pa e adultonan mayor cu ta biba na cas.

- Redusi e peso fiscal riba adultonan mayor, eliminando belasting riba pensioen di biehes (AOV-uitkering), y reduciendo e prima di AZV cu e pensionado mester paga por medio di un 'gliding scale', cual lo brinda beneficio financiero na esnan cu aparte di nan pensioen di biehes, tin otro entrada.

NOS COMPROMISO PA HASI ARUBA MAS SIGUR

- Institui un plataforma nacional consistiendo di tur departamento cu mester atende cu criminalidad y profesionaliza e departamentonan mas ainda: Cuerpo Policial, Ministerio Publico, KIA, CEA, Reclassering, Departamento di Asuntonan Social, Migracion, Warda nos Costa, Aduana. Den e plataforma aki lo tuma e decisionnan pa un Aruba mas sigur, y e decisionnan aki mester wordo ehecuta cu prioridad halto.

- Control estricto di nos costanan, pa detecta y actua mesora contra importacion ilegal di droga, arma y hende, pa medio di entre otro radarnan, Polis Maritimo, Warda nos Costa, Imigracion, Aduana.

- Maneho lo concentra riba PREVENCION, en bes di e maneho di represion. Mas “blauw” riba caya. Polis di bario mester wordo fortifica cu material y personal pa por traha efectivamente; polis di bario mester traha hunto cu gruponan consistiendo di bisiñanan den bario pa vigila den bario.

NOS COMPROMISO PA MEHORA CUIDO DI SALUD

- Mas dokter di cas y especialista pa cada ciudadano haya e oportunidad di un atencion medico specialisa y rapido, y amplia e cantidad di enfermeronan y persona cu ta

traha den e area di cuidu, y brinda nan condicionnan di trabou atractivo; solucionan e problema di nos studiantenan di medicina cu ta studia den regio cu nan diploma no ta wordo reconoci.

- Mas CentroMedico y di Diagnostico riba nos isla pa duna asistencia medico inmediatamente, cuminsando cu upgrade Centro Medico San Nicolas y hasi’e un hospital; riba termino largo mester tin un Centro Medico y di Diagnostico den cada distrito, cu posibilidad di hasi dialisis y asina trese e cuidu medico mas serca di e ser humano.

- Cuidu medico di calidad y adecua pa adultonan mayor en general, sin discriminacion di edad; Aruba tin mester di mas geriatra pa brinda e cuidu di salud di calidad na nos adultonan mayor.



- Combati adiccion, enfocando mas riba prevencion pa medio di recreacion sano, y crea centronan adecua pa brinda e guia y tratamiento cu cada adicto mester.

NOS COMPROMISO PA ATENDE CU E CRISIS FINANCIERO

- Den prome 30 dia di gobernacion un comision di expertonan Financiero Economico di nos pais lo inventarisa situacion financiero real di nos pais, y a base di e inventarisacion, resultado y recomendacionnan lo cuminsa deliberacionnan cu gremionan, Parlamento y pueblo di Aruba, cu lo conduci na recomendacionnan pa defini prioridadnan y areanan di atencion urgente pa e prome anja di gobernacion.
- Re-financia nos debe den un forma cu e lo no bai afecta nos poder di compra, esta no cu medida, pero restructura e debe di nos pais cu nos plan di rescate cual ta ensera un prestamo bou di e interes cu nos ta pagando awor aki.
- Aplica un maneho di austeridad den gastonan di gobierno "top-down"; cambia e prioridadnan den gobernacion, bahando e gastonan inecesario mas tanto posibel.
- Restructura sistema di impuesto, y combirtie den uno mas sensiyo, mas husto y mas moderno.

NOS COMPROMISO PA ENSEÑANSA DI CALIDAD

- Reforma den Enseñansa, cu introduccion y implementacion di Papiamento na scolnan su debido atencion y prioridad, alocando fondonan pa por realiza esaki.
- Digitalisa Enseñansa y introduci internet den tur scol, smart boards – digi boards, y material di scol mester ta den tablets y i-pads.
- Cambia structura di curriculum y orario di scol, incluyendo movecion como parti integral di e curriculum, y ampliando e orarionan di scol te atardi, caminda lo duna materianan manera arte, musica, arte visual, den oranan di despues di merdia.
- Cambia sistemanan actual di Enseñansa profesional y dirigí'e riba necesidad di trabou na Aruba.
- Brinda mas asistencia social na tur scol pa atende cu problemanan social y pa brinda mas seguridad na alumno y docentenan. Asina e docente lo tin mas tempo pa por duna les. Atencion especial lo wordo duna na un maneho nacional riba 'bullying'.
- Hasi Enseñansa accesible pa TUR estudiante, esnan di menos recurso lo ricibi un subsidio cu realmente ta tene nan na scol, y lo reduci e prijs di Staatsexamen cu awo ta ta un estorbo pa esnan di menos recurso.